

Uunga siunnersuut: Aalisarneq pillugu Inatsisartut inatsisaat
Aalisarnermut Piniarnermullu Naalakkersuisumit saqqummiunneqartoq

pillugu

Aalisarnermut, Piniarnermullu Nunalerinermullu Ataatsimiititaliap

siunnersuutip aappassaaneerneqarneranut

ISUMALIUTISSISSIONTAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Kristian Jeremiassen, Inuit Ataqatigiit, siulittaasoq
Inatsisartunut ilaasortaq Jens Napātōk, Naleraq, siulittaasup tullia
Inatsisartunut ilaasortaq Harald Bianco, Inuit Ataqatigiit
Inatsisartunut ilaasortaq Mikivsuk Thomassen, Inuit Ataqatigiit
Inatsisartunut ilaasortaq Jens Kristian Therkelsen, Siumut
Inatsisartunut ilaasortaq Karl Tobiassen, Siumut
Inatsisartunut ilaasortaq Jens Frederik Nielsen, Demokraatit

UPA2024-mi ulloq 11. aprili mi siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Naalakkersuisut nassuaapput siunnersuummi qulakkerinninnissamut tunngavigneqartut tassaasut pisuussutit inuiaqatigiit pigisarigaat, uumassusilinnik piujuartitsinissaq, aningasaqaarnikkut piujuartitsinissaq, inuuniarnikkut attanneqarsinnaasumik ingerlatsinissaq, ingerlatsivimmi sunniuteqarluni akuliutinnginnissaq, paasisutissanik katersinissaq ingerlatsivimmilu ammasumik pissuseqarnissaq. Taakku siunertaralugit siunnersuutip ilaatigut imarai piffissap ikaarsaariarfiusup kingorna Kalaallit Nunaanni aalisarnermik ingerlataqarnermi kalaallit 100 %-imik piginnittuunissaat kiisalu pisassiissutit piffissami killilimmi atuuttunngortinnissaat piumasaqaataassammata. Sumiiffimmi 47-mi sinerissap qanittuani qaleralinniarnermi pisassiissutinut niuerutigineqarsinnaasunut nammineq pigisanut aaqqissuussinermik (PNNP) ilaannakortumik allanillu aalisarnermi pisassiissutinik niuerutigineqarsinnaasunik nammineq pigisanik atuutsitsisoqalissaaq. Aammattaaq

pisassiissutit amerlassusaasa killissaat piginnittuunermullu tunngasut iluarsiivigineqassapput kiisalu paasissutissanik katersisarnermut periutsit nutarterneqassallutik.

2. Siunnersuutip Inatsisartunit siullermeerneqarnera

Siunnersuut siullermeerneqarmat siammasissumik oqallittoqarpoq. Siunnersuut ilaannakortumik taperserneqarpoq, siunnersuutillu immikkoortuisa ilaannut atatillugu siunnersuummi immikkoortut pingaarcerit qitiusut erseqqissarneqarnissaat iluarsiivigineqarnissaallu siunertalarugit suliarinnitoqaqqinnissaa pisariaqartoq oqaatigineqarluni. Tamanna pissutigalugu siunnersuut Aalisarnermut, Piniarnermut Nunalerinermullu Ataatsimiititaliamit suliarineqartussanngorlugu innersunneqarpoq.

3. Tusarniaanermut akissutit

Siunnersuut piffissami 29. november 2023-mit 24. januar 2024-p tungaanut tusarniaassutigineqarpoq.

Tusarniaanermut akissutit inatsisisatut siunnersuummut ilanngunneqarput, tamannalu Inatsisartut Siulittaasoqarfiata iluserititassatut piumasaqaataanut naapertuulluni.

Piffissap tusarniaaffiusup sivisussusia kiisalu tusarniaanermut akissutit siunnersuummut naammattumik ilanngunneqarsimanersut pillugit pisortatigoortumik oqallinnermi Inatsisartunilu siullermeerinninnerup ingerlanneqarnerani initungaatsiarsimasut ataatsimiititaliamit maluginiarneqarpoq.

Piffissap tusarniaaffiusup sivisussusianut atatillugu Naalakkersuisunit oqaatigineqarpoq siunnersuut sapaatip akunnerini arfineq pingasuni tusarniaassutigineqarsimasoq, naak Naalakkersuisut tusarniaanermut najoqqutarisassaat malillugit tamatuma sapaatip akunnerinik sisamanik taamaallaat sivisussuseqarnissaa piumasaqaataagaluartoq. Tassunga atatillugu aalisarneq pillugu ataatsimiititaliarsuup isumaliutissiissuteqarneraniilli siunnersuutip matumani pineqartup saqqummiunniarneqarnera ukiut marluk sinnerlugit sivisussuseqarsimanera tikkuarneqarpoq. Tuarniaanermut akissutit tiguneqartut siunnersuummi aalajangersakkani 15-init amerlanerusuni allannguisoqarneranik nassataqartut Naalakkersuisut ataatsimiititaliamut paasissutissiissutigaat.

4. Siunnersuutip oqaluttuassartaa suliarineqarneralu

Aalisarneq pillugu inatsit maanna atuuttoq 1996-imeersuovoq kingusinnerusukkullu allanngortinneqarluni. 2017-imi Inatsisartut ukiakkut ataatsimiinneranni aalisarneq pillugu inatsisisamut nutaamut siunnersuut Inatsisartunut saqqummiunneqarpoq siullermeerneqarlunilu, atorunnaarlunili.

Aalisarneq pillugu ataatsimiititaliarsuaq 2018-imi pilersinneqarpo sulianilu 2019-imi aallartillugu. Taanna soqutigisalinnik, tassungalu ilanngullugu aalisarnermik inuussutissarsiutilinnik, biologibnik, aningaaserivinnik allanillu peqataaffigineqarpoq. Ataatsimiititaliarsuup isumaliutissiissutaa 2021-mi saqqummiunneqarpoq. Nuummi,

Maniitsumi Ilulissanilu ataatsimiinnerni saqqummiunneqarpoq. Kingornagut Nuummi Ilulissanilu soqutigisallit peqataaffigisaannik aalisarneq pillugu isummersoqatigiinnerit ingerlanneqarput. Aammattaaq Aalisarnermut Piniarnermullu Naalakkersuisuusimasut marluusut siunnersuutip matumani pineqartup suliarineqarneranut atatillugu Kalaallit Nunaata Kitaani tamarmi innuttaasunik ataatsimiisitsimapput. Siunnersuut aalisarneq pillugu ataatsimiitaliarsuup isumaliutissiissutaanik aallaaveqartoq Naalakkersuisut tikkuarpaat, aammali isummersoqatigiinnernit, innuttaasunik ataatsimiisitsinernit oqaloqatigiillunilu ataatsimiinnernit aalisarnermik soqutigisallit peqatigalugit ingerlanneqartunit annertuumik sunnerneqarsimalluni. 2023-mi aasaanerani Inatsisartuni partiit politikkut isumaqatigiissusiorput, tamatumani siunnersuutip imarisaaanut ilanngussinissaminut periarfissaqaqtinnejarlutik.

5. Sassartitsinerit

Ataatsimiitaliaq siunnersummik matumani pineqartumik suliarinninnermini soqutigisaqaqatigiinnit matuma kinguliani allassimasunit aallartitanik ataatsimeeqateqarpoq:

- QAK
- Royal Greenland
- Grønlandsbanken
- KNAPK
- Bank Nordik
- Sulisitsisut aalisarnermik avammullu nioqquteqarnermik inuussutissarsiortunut ataatsimiitaliaat
- SISA
- Polar Seafood Greenland
- Nutaaq Seafood ApS – pilersinneqalersoq
- Nunatsinni kommunini ukunani borgmesterit: Avannaata Kommunia, Qeqqata Kommunia, Kommune Qeqertalik, Kommunqarfik Sermersooq aamma Kommune Kujalleq
- SIK
- Polar Seafood KNAPK peqatigalugu

Ataatsimiitaliami peqqissaartumik suliarinninnissaq qulakkeerniarlugu siunnersummi immikkoortut ilarpassui paasisaqarfigiumallugit ingerlataqartut soqutigisaqaqatigiillu tusarniarnissaat pingaaruteqartoq ataatsimiitaliaq isumaqarpoq. Sassartitsinnejartunik assigiinngitsunik ataatsimeeqateqarnerit imarisaaat assigiinngitsorujussuupput. Sammineqartut aningaasalersuinermut, tunitsivinnut, pisassiissutit amerlassusaasa killissaannut, piginnittuunermi pissutsinut allanullu attuumassuteqarput. Aningaasaqarnermut Akileraartarnermullu Ataatsimiitaliaq ataatsimiinnerni taakkunani aamma peqataavoq.

6. Inatsisartut ataatsimiitaliaannik allanik peqataatitsineq

Inatsisisatut siunnersuutip inuiaqatigiinnut annertuumik pingaaruteqarnera, taamaalillunilu Inatsisartuni ataatsimiitalianut arlalinnut attuumassuteqarnera pissutigalugu siunnersuutip siullermeerneqarnerani ataatsimiitaliat allat peqataatinneqarsinnaanerannut periarfissat erseqqissaatigineqarput. Tamatuma saniatigut partiit ataatsimiitaliami aallartitaqartut kisimik pinnatik partiilli tamarmik ataatsimiitaliap sulinerani peqataatinneqarsinnaanerat oqaluuserineqarpoq.

Aningaasaqarnermut Akileraartarnermullu Ataatsimiitaliaq peqataatinneqassasoq ataatsimiitaliap suliarinninnermini aalajangerpaa.

7. Ilisimatitsiffiusumik ataatsimiinnerit Naalakkersuisunullu apeqquteqaatit

Ataatsimiitaliap siunnersummik suliarinninnermini atugassatut apeqqutit arlallit akissuteqarfijeqqullugit Aalisarnermut Piniarnermullu Naalakkersuisoq marloriarluni qinnuigaa. Ataatsimiitaliap apeqqutai ilangussaq 1-itut Naalakkersuisullu 25. aprili aammalu 29. aprili akissuteqaataat ilangussaq 2-tut kakkiunneqarput.

Aalisarnermut Piniarnermullu Naalakkersuisup ataatsimiitaliaq ataatsimiinnermut persuarsiorfiunngitsumut 29. aprili ingerlanneqartumut aggersarpaa.

8. Siunersiuineq

Ataatsimiitaliap suliarinninnermini Aalisarnermut Piniarnermullu Naalakkersuisoq siunersiuinissamut marloriarluni aggersarpaa. Siunersiuinissamut aggeqqusissutit ilangussaq 3-tut ilangunneqarput akissutillu ilangussaq 4-tut ilangunneqarlutik.

9. Ataatsimiitaliap siunnersummik suliarinninnera

Siunnersuut Inatsisartunit siullermeerneqarami siammasissumik oqallisigineqartoq, siunnersummilu isigniagassat ilaat amerlasuut sukumiisumik oqaluuserineqartut ataatsimiitaliamit maluginiarneqarpoq. Ataatsimiitaliap suliarinninnermini soqutigisallit arlallit ataatsimiitaliap siunnersuut pillugu isumaliutigisaanut tapersiisut ataatsimeeqatigai. Aammattaaq ataatsimiitaliap Aalisarnermut Piniarnermullu Naalakkersuisoq siunersiuinermut aggersarpaa kiisalu ataatsimiitsitaliamut sassartitsinissat kisaatigineqartut aammalu sassarumallutik qinnuteqartut tamarmik naapinneqarlutik. Suleriaaserlu naapertorlugu sassartitsinerit ingerlanneqarsimallutik. Ataatsimiinnerit tapersiissutit tunngavigalugit ataatsimiitaliap siunnersuut suliaraa. Oqaluuserinninnerni sammiviit pingarnerit immikkoortuni tulliuttuni nassuarneqarput.

9.1. Pisassiissutit, pisassiissutit amerlassusaasa killissaat aamma ingerlatseqatigijiffit pisortanit pigineqartut

Siullermeinninnermi oqaluuserineqartut ilarpassui pisassiissutit amerlassusaasa killissaat kiisalu pisassiissutit procentitaat iluarsiivigineqartariaqarnersut pilligit siunnersummi aalajangersakkanut attuumassuteqarput.

Ilaatigut inatsisitigut akisussaatitaasunut pisussaatitaasunullu, inunnut ataasiakkaanut ingerlatseqatigiiffinnulu pisortanit pigineqartunut pisassiissutit amerlassusaasa killissarisaannut procentit nutaat siunnersummi aalajangersarneqarput. Inatsisitigut akisussaatitaasut pisussaatitaasullu pisassiissutit amerlassusaasa killissaannik TAC-t tamarmiusut procentiata annertunerpaaffisaanit matuma kinguliani allassimasumit annertuneroqqusaanngitsunik peqarnissamik § 32, imm. 1, nr. 1-5-ini aalajangersakkami peqquneqarput:

- 1) *Kalaallit Nunaata kitaani raajarniarneq: 20,000%*
- 2) *Tunumi raajarniarneq: 33,333%*
- 3) *Kalaallit Nunaata kitaani sinerissap qanittuani qaleralinniarneq, tak. § 28, imm. 1, nr. 4): 2,500%*
- 4) *Kalaallit Nunaata kitaani saattuarniarneq: 17,000%*
- 5) *Kalaallit Nunaata kitaani § 28, imm. 1-imut ilaasunik aalisagaqatigiinnik assigiinngitsunik avataasiorluni aalisarneq: 20,000%*

Inunnut ataasiakkaanut pisassiissutit amerlassusaannut killigititaq siullermeerinninnermi aamma oqaluuserineqarpoq. Tamatumunnga atatillugu oqariaaseq "inuit ataasiakkaat" oqallisigineqarpoq, tassami siunnersuut malillugu "inuit ataasiakkaat" pineqartillugit tassani aamma ilaassammata taakku qanigisaat kiisalu taakku toqqaannartumik toqqaannanngitsumillu piginnittuunerat. § 32, imm. 2, nr. 1-3-ni aalajangersagaq naapertorlugu oqaatigineqarpoq, inuit ataasiakkaat matuma kinguliani allassimasut qaangerlugit TAC-mit pisassiissutinik pigisaqaqquaanngitsut:

- 1) *Kalaallit Nunaata kitaani raajarniarneq: 12,500 %*
- 2) *Kalaallit Nunaata kitaani sinerissap qanittuani qaleralinniarneq: 2,500%*
- 3) *Kalaallit Nunaata kitaani saattuarniarneq: 12,500%*

Naalakkersuisut oqarnerat malillugu pisassiissutit amerlassusaannut killiliinerit taakku piginnittuunerup siammerternissaanik qulakkeereqataassapput, taamaalillunilu pisassiissutit assanni ikittuni eqiterutinnginnissaat qulakkeerlugu. Ingerlatsisut ilaat aalajangersakkanik malinnikkumallutik pisassiissutimik ilaannik tunisaqartariaqassapput. Tamanna partiit akornanni assigiinngitsunik isumaqarfingineqartoq ataatsimiititaliamit maluginarneqarpoq.

Royal Greenland taassumalu atuuffia siullermeerinninnermi oqallisigineqangaatsiarpoq. Siunnersuut malillugu Royal Greenland ingerlataqartunut namminersortunut allanut sanilliullugu immikkut iluaquserneqassassoq oqallinnerup ingerlanerani ilaatigut erseqqissaatigineqarpoq.

Ingerlatseqatigiiffit pisortanit pigineqartut toqqaannartumik toqqaannaanngitsumilluunniit Kalaallit Nunaannut TAC-ni pisasssiissutinik matuma kinguliani allassimasut qaangerlugit

annertussusilinnik pigisaqqusaanngitsut siunnersuummi § 32, imm. 3, nr. 1-5-ini allassimavoq:

- 1) *Kalaallit Nunaata kitaani raajarniarneq: 33,333%*
- 2) *Tunumi raajarniarneq: 33,333%*
- 3) *Kalaallit Nunaata kitaani sinerissap qanittuani qaleralinniarneq: 2,500%*
- 4) *Kalaallit Nunaata kitaani saattuarniarneq: 17,000%*
- 5) *§ 28, imm. 1-imut ilaasunik Kalaallit Nunaata kitaani aalisagaqatigiinnik assigiinngitsunik avataasiroluni aalisarneq: 40,000%.*

Assigiinngissut tamanna inatsisisstatut siunnersuummut nalinginnaasumik nassuaatini ilaatigut ima nassuarneqarpoq “*Royal Greenlandip ingerlatseqatigiiffinnut namminersortunut sanilliullugu assigiinngissutigaa inuiaqatigiinni, suliffeqarnermi, isumaginninnikkullu pisussaaffilersugaanera, ingerlatseqatigiiffit namminersortut taamatut pisussaaffilersugaanatik.*” Tamatuma saniatigut pisassiissutinit pigisat oqaatigineqartut piginnittuunermik siammarterutaasutut Naalakkersuisunit isineqarput, Royal Greenlandip pisortanit pigineqarnera pissutigalugu.

Taamatut immikkut iluaquserneqarneq partiit akornanni assigiinngiaartumik isumaqarfingineqartoq ataatsimiitaliamit maluginiarneqarpoq. Illuatungaatigut Royal Greenlandip tunitsivinnik ammasunik peqarnissamut pisussaaffeqarnera aammalu sumiiffinni ingerlatseqatigiiffinit allanit unammilleqatigiinnermi atugassarititaasut atorlugit tunitsivinnik ingerlatsinissamut periarfissaqarfiunngitsutut nalilerneqartuni suliffissanik tuntsiveqarnermilu periarfissanik qulakkeerinera aalisarneq pillugu inatsimmi immikkut inissisimatinneqarnera akuersaarneqarpoq. Akerlianik ingerlataqartut tamarmik unammilleqatigiinnermi assigiimmik atugassaqarnissaat qulakkeerneqassasoqq kissaatigineqarpoq, taamaattumillu Royal Greenlandip pisassiissutitigut assigiinngitsunik periarfissinneqarnermigut immikkut atugassaqartinneqarnera pitsaanngitsutut isagineqarluni.

Siunnersummik suliarinnereernermini ataatsimiitaliaq isumaqarpoq ingerlatsisut unammilleqatigiinnikut assigiimmik atugassaqartinneqarnissaat pingaaruteqartoq. Taamaattumillu pisassiissutit amerlassusaasa killissaat eqqarsaatigalugit siunissami ikaarsaariarfeqartumik ingerlatseqatigiiffit pisortanit pigineqartut namminersortullu naligiissinneqarnissaat ataatsimiitaliamit piumasarineqarpoq.

Ataatsimiitsitaliami amerlanerussuteqartut kaammattuitigaat piffissami aaliangersimasumi ikaarsaariafilikkamik, ingerlatseqatigiiffinnut pisortanit pigineqartunut nunatta kitaani raajarniarnermi pisassiissutit amerlassusaasa qummut killissaat 33,33 %-imiit nalimmassarneqassasoq, ingerlatseqatigiiffinnut allanut piumasaqaataalersussanut naapertuussarlugu. Taamatut kaammattuineq tunngaveqartinneqarpoq, Royal Greenlandip

ingerlatseqatigiiffinnut namminersortunut sanilliullugu assigiinngissutigimmaq inuiaqtigiaanni, suliffeqarnermi, isumaginninnikkullu pisussaaffilersugaanini, ingerlatseqatigiiffiit namminersortut taamatut pisussaaffilersugaanatik. Taamaalillunilu inoqarfippassuarni inooqatigiinnikkut aningaasarsiornikkullu qitiullunnarluni. Ingerlaannartumik naligiimmik piumasaqarfingineqassaguni inuiaqtigiainnut equngasumik kingunerlunnginnissaa uani aamma pineqarpoq.

Ataatsimiitsitaliami amerlanerussuteqartut kaammattuutigaat Royal Greenlandip nalimmassartinneqalermerani, najukkani aalisartut peqatigalugit tamakkiisumik imaluunniit piginneqatigiinnikkut aaqqissuussisoqassasoq.

9.2. Piginnittuuneq

Inatsisisstatut siunnersuummi aalisarnerni tamani kalaallit 100 %-imik piginnittuunissaat equnniarneqarpoq. Aammattaaq nunat allamiut piginnittuunerisa atorunnaarsikkiartuaarnissaanut ikaarsaariarfiusumik piffissaliisoqarpoq.

Kalaallit Nunaanni ukiuni tallimani aalajangersimasumik najugaqarsimanissaq akuersisummik pissarsinissamut piumasaqaataasoq ataatsimiititaliamit maluginiarneqarpoq. Nunat allamiut nunatsinni aalisarnermik inuussutissarsiuteqarunnaarnissaannik piumasaqaat inatsisisstanut siunnersuummut nassuiaatit malillugit inuussutissarsiutinut annertuumik aningaasartuuteqarfiususanut aningaasanik pissarsiniarnermut periarfissanut sunniuteqassaaq. Aammattaaq nunatsinneersunit piginnittoqarnissaanik siunnersuummi piumasaqaat assersuutigalugu kujataani tunumilu umiarsuaatileqatigiinnit nunanit allamiunit pigineqartunit ingerlatsiviusuni aalisarnermik inuussutissarsiutilinnut sunniuteqassaaq.

Siunnersuut soraarnerussutisiaqalernissamut aningaasaateqarfiiit aalisarnermik inuussutissarsiummut aningaasaliisinnaanissaannut periarfissiissaq.

Aalisakkat isumalluutit kalaallinit 100 %-imik pigineqarnissaasa qulakkeerneqarnissaanik Naalakkersuisut kissaatigisaat ataatsimiititaliamit iluarisimaarneqarpoq. Tamanna namminiilivinnissamut ingerlanermi alloriarnertut pingaarutilittut ataatsimiititaliamit isigineqarpoq.

Tassunga atatillugu ataatsimiititaliap oqaatigissavaa nunatsinni pisassiissutit ilaat EU-mut tunniunneqartarmata. Aalisakkat isumalluutit nunatsinni innuttaasunut tunniunneqarnissaannik qulakkeerinninniarnerup ilaatut EU-mut pisassiissutit taarsiullugu kalaallinut aalisartunut tunniunneqarsinnaanerannut periarfissat misissoqqullugit Naalakkersuisut ataatsimiititaliamit kaammattorneqarput.

Ataatsimiitsitaliami amerlanerussutilit Naalakkersuisunut kaammattuutigaat, avataaniit piginnittuusinnaanermut immikkut ittumik akuersisisinnaaneq allannguutissatut

siunnersuuteqarnikkut peerneqassasoq. Taamaalilluni tamakkiisumik inatsisisssatut siunnersuutaasup ikaarsaararfegareernerani, nunatsinnit tamakkiisumik piginnittusuussaanerup naqissuserneqarnissaa qulakteerneqassammat.

9.3. Aqutsiveqarfiiit

Aqutsiveqarfik 47 siullermeerinninnermi oqallisigineqarluartoq ataatsimiititaliamit maluginiarneqarpoq. Pingaartumik PNNP-mik aaqqissuussinerup ilaannakortup kingunerisinaasai kiisalu pisassiissutit amerlassusaasa 2,5 %-imik killilerneqarnerat oqallinnermi erseqqissaatigineqarput.

Aqutsiveqarfimmi 47-mi umiatsiaaqanut 6 meterit ataallugit takissusilinnut PNNP-mik aaqqissuussineq ilaannakortoq siunnersuutikkut atuutilersinnejassaaq. Tamanna malillugu ingerlataqartut ullumikkut paggatassiissutinik aalisartut PNNP-mik aaqqissuussinermut ilaalernissaminnut periarfissaqalissapput. Taamaaliornikkut angallatinut 6 meterit sinnerlugit takissusilinnut ataatsimoortunut PNNP-mut ilaareersunut ilaalissapput. Taamatut aaqqissuussineq aalisarnermik sunniuteqarnerulersitsissasoq kiisalu aalisartut aalisarnerminnik namminneq aaqqissuussinissamut periarfissaannik pitsaanerulersitsissasoq Naalakkersuisut ilaatigut nassuaatini oqaatigaat.

Aammattaaq aqutsiveqarfip 47-p sumiiffinnut pingasunut aggulunneqarnissaanut periarfissaq siullermeerinninnermi eqqaaneqarpoq.

Pisassiisarnerni aqutsiveqarfik 47 ataatsimut pisassiiffigineqartassasoq ataatsimiititaliaq isumaqarpoq, pisassiissutinik tunniussineq aqutsiveqarfik 47 sumiiffittut ataatsimoortutut isigalugu, annerpaamik pisassiissutit 2,5 %-tinut naatsorsorneqarlutik. Ataatsimiititaliaq isumaqarportaaq, ulluinnarni aqtsinermi aqutsiveqarfik 47 pingasunut aggulunneqarsimassasoq, tamannalu Naalakkersuisut nalunaarusiornermikkut naammassisassagaat.

9.4. Ilinniartitaaneq

Aalisarnermut tunngasut iluanni ilinniartitaanerup ilisimatusarnerullu pingaartinnerunissaat pisariaqartoq nalinginnaasumik oqaatigineqartoq ataatsimiititaliamit maluginiarneqarpoq. Aalisakkanik tunisassianik suliarinninnermi suliareqqiinermilu ilisimasaqarnerulernissaq periarfissaqarnerulernissarlu siunertaralugu iliuusissanik allanik aalajangersimasunillu aallartitsisoqarnissaa pisariaqartinneqartoq oqaatigineqarpoq. Taamaattumik aalisarnikkut periarfissat annertusarniarlugit pitsangorsarniarlugillu aningaasanik immikkoortitsisoqartariaqartoq ataatsimiititaliaq nalinginnaasumik isumaqarpoq.

Aammattaaq aalisarnermi aningaasaqarneq pillugu institutimik pilersitsinissaq siunertaralugu Naalakkersuisut suliniutit attuumassuteqartut allat ilaanni suleqatigiissitaliorsimanerat ataatsimiititaliamit pitsasutut isigineqarpoq.

9.5. Tulaassisussaatitaaneq, iluaquteqarnissamut pisussaatitaaneq suliffissaqartitsiniarnerlu

Raajarniarnermi tulaassisussaatitaaneq inatsisisstatut siunnersummi allanngortinneqarpoq, taamaalilluni Kalaallit Nunaata kitaani raajarniarnermik ingerlatsisut pisamik 25%-iannik siunissami tulaassisussaatitaalissallutik, taamaalillutillu aamma pisamik 75%-iisa missaannik angallammi suliarinninnissamut periarfissaqassallutik.

Tamatuma saniatigut ukiumoortumik pisassiissutit 85%-iannik iluaquteqarnissamut pisussaaffik atuutsinnejallissaq. Ingerlataqartoq pisassiissutit 85%-iinik pisaqarsinnaanngikkuni pisassiissutit 8%-iannik tunisinissaminut periarfissinneqassaaq. Aammattaaq pisassiissutit 15%-iannik nuussinissamut periarfissaqalissaq.

Siunnersummi procentit equnneqartut siullermeerininnermi aamma oqallisigineqarput.

Ukiumoortumik pisassiissutit 85 %-iinik iluaquteqarnissamut siunnersummi pisussaaffik aalisartunut artukkiisinnaasoq ataatsimiititaliaq isumaqarpoq, tassa silap pissusia pissutsillu allat pissutigalugit piumasaqaatip eqquutsinniarnera ajornarluinnarsinnaammatt.

Taammattumik allannguutissatut siunnersummik saqqummiusseqqullugit Naalakkersuisut ataatsimiititaliami amerlanerussuteqartunit kaammattorneqarput, taamaalilluni iluaquteqarnissamut pisussaaffik 75 %-imut appatinneqarluni.

Suliffissaqartitsiniarmut kingunerisassatut naatsorsuutigisat siunnersummut nassuaatini takuneqarsinnaapput.

Pisassiissutit aammalu piffissaq PNNP malillugu avataasiorluni aalisarnermut ikaarsaariarfiusoq, kalaallit 100%-imik piginnittuunissaat kiisalu Kalaallit Nunaata kitaani PNNP malillugu avataasiorluni qaleralinniarnermik ingerlatsisut amerlanerulernissaannut periarfissaq suliffissaqartitsinerup annertunerulernissaanik nassataqassangatinneqarput.

Tunisassiorsinnaanermut akuersissutit qaffasinnerusut, saattuarniarnermi PNNP-p atorneqalernissaa kiisalu sinerissap qanittuani umiatsiaararsorluni aalisarnermi PNNP-p atorneqalernissaa suliffissaqartitsinerup annikilleriarneranik kinguneqarsinnaapput.

Aalisarneq pillugu inatsisip nutaap kingunissaasa aalisarnermik inuussutissarsiummi suliffissaqartitsinermut kalluaannginnissaat ataatsimut isigalugu pingaaruteqartoq ataatsimiititaliaq isumaqarpoq.

Ataatsimiitsitaliami amerlanerussuteqartut Naalakkersuisunut kaammattutigaat nunamut tulaassisussaatitaanermut minnerpaaffiliussap 25%-imiit 30%-imut qaffanneqassasoq. Taamaalilluni sulisartoqarnikkut, suliffissaqarnikkut kiisalu nunami aalisarnermit sunnerneqartumik aningaasarsiornerup suli periarfissaanissaa tunngavissaqaqqullugu. Soorlu Aasianni aalisakkanut suliffissuup ataannarnissaanut qulakkeerinneqartaassammat. Amerlanerussuteqartut taamak isumaat aamma

tunngaveqarpoq tusarniaanermiit aamma sassarttsisarnernit nunami suliffissuaqarnerup sulisartoqarnerullu qanoq pingaartigineranik oqariartuutinut naalaarnissaq naaperiaanissarlu. Ataatsimiitsitaliami amerlanerussuteqartuttaaq kaammattuutigaat, tunisassiorfiup Aasianni matuneqassalluni oqariartuutigineqartup piuinnarnissaanut aaqqiissutissanik Naalakkersuisut aqqutissiuusseqataaqgullugit.

10. Siunnersuutip aningaasaqarnikkut kingunerisassai

Siunnersuutip piviusunngortinneratigut aningaasaqarnikkut kingunerisassat siunnersuummut nalinginnaasumik oqaaseqaatit ataanni nassuaatigineqarput.

Siunnersuutip immikkoortuisa ilai taarsiivigineqarnissamik piumasaqaateqartoqarneranik kinguneqarsinnaasumik arsaarinnissuteqarnertut iluseqartumik nassataqarsinnaanersut Naalakkersuisut nassuaatini isummerfigisimagaat ataatsimiititaliamit maluginiarneqarpoq. Inatsit taamatut pisoqarsinnaanerata pinngitsoortinnissaa siunertaralugu suliarineqarpoq.

Inatsisisstatut siunnersuutip piviusunngortinneqarnerani kingunerisassanut naatsorsuinerimi atorneqartut erseqqinnerusumik paasineqarnissaannik pisariaqartitsisoqarsimasoq ataatsimiititaliamit maluginiarneqarpoq. Taamaattumik kisitsisit naatsorsuinerillu inatsisisstatut siunnersummi matumani pineqartumi tunngavigineqartut itisilerneqarnissaat erseqqissarneqarnissaallu pisariaqartoq ataatsimiititaliaq isumaqarpoq.

Aningaasaqarnikkut kingunerisassanik naatsorsuinerit nalornissutaanerat pissutigalugu ataatsimiititaliaq taakkununnga tunngasunik ilaatigut apeqquteqarpoq. Piffissami ikaarsaariarfiusumi aningaasalersuutissanik qulakkeerinninnissaq ataatsimiititaliamit pingaaruteqartutut isigineqarpoq, taamaattumillu aalisartunut aningaasaliisinnaanikkut aningaasanillu attartornissamut qularnaveeqqusiiissutaasinnaasunik periarfissanillu qulakkeerinneqqullugit Naalakkersuisut kaammattorneqarput. Taamaalilluni ikaarsaariarnermi aalisartut ineriartortuarnissaannut qulakkeerinnittussamik. Ataatsimiitsitaliammi maluginiarpaan tusarniaanermi aammalu sassarttsisarnermini tamanna avaqqunneqarsinnaanngitsoq aaqqiissuteqarfigissallugu.

11. Ataatsimiititaliap inassuteqaatai

Ataatsimiititaliami amerlanerussuteqartut Naalakkersuisut qulaanni saqqummiunneqartunut allannguutissatut siunnersuummik saqqummiussereerneranni siunnersuut iluserilikamisut iluseqartoq akuerineqassasoq **ataatsimiititaliami amerlanerussuteqartut Inuit Ataqatigiinneersut Siumumeersullu inassutigaat.**

Ataatsimiititaliamit ikinnerussuteqartut Naleqqameersut sinnersuut pillugu ima oqaaseqarumapput:

Inuaqatigiinni aalisarneq aningaaasarsiorfitta pingaarnersaraat taamaammat torrallaanissaq atuisunullu aaqqiinissaq pingaaruteqaqaaq.

1990-ikunni kukkussutaasimasut ilinniarfiginissaat pingaaruteqarpoq ilami ilaqtariippassuit taamanikkut eqquaanikut ullumimut eqquaasut aaqqiiffiginagit pisuutitassiorluta inissimalersimanerput inuaqatigiinni ilungersungartuuvoq. Pisuititassarsiorani eqquaasimasut qanoq aaqqiiffigisinnanaenerigut ujartuinata maanna aammalluta kukkussutaasimasut ilinniarfiginguarnagit inuaqatigiinnut annertoorujussuarmik allannguiffiusussamik aaqqissuussisoqalerpoq

Nunarput Qallunaat Nunaannut pitutorlugu avammut niuernermu aqutissatuatut isigalugu, aalisartunut akit pitsaanerusussat aqutissioqqinnagit akiluttortitsineru saniatigut nunatsinni erniakkaanik attartuititsisarneq eqqunneqarnialerpoq tamannalu aalisartunut sunniutipiluutaaginnarani akinut pitsaanngitsumik sunniuteqartussanngorlugu aaqqissuussisoqalernera Naleqqamiit niuernerlunnerujussuartut taallugu isumaqatigingilluinnaqqissaarparput

Ineriartornerup takutippaa raajarniutit 200 pallinnikuulligit amerlassuseqarnikuusut maannakkut ikittuararsuanngorlutik inissimalersimasut, taakkulu nunamut tulaassuinerat tulaassuisussaatitaanerat nunami suliffinnut iluaquataallutik inissimananikut maannakkut aaqqissusseqqinniarnermi fabrikkit pilliutaanialerput tamnnalu inuaqatigiit annertuumik malugisussaavaat aali aalisarneq inuussutissarsiutitta pingaarnersaattut inissiisimasuugaluartoq eqqarsaatigingilluinnarlugit inuppassuit aaqqiissusseqqinnikkut maannakkut eqquaanerluttussanngorlugin aaqqiisoqalerpat Naleqqamiit ugoreqaarput atuisut tusaanagit politikkikkut sattaaserluni aaqqissuussisoqalermat.

Pisassat nalillit nioqutigineqarsinnaasut pigisat eqqunneqarnerani aalisartut, sulisartut aamma namminersortut amerlasuut pilliutaalerput taamatullu malitsigisaani sineriammi inuerusaaneq annertooq sakkortusillugu ingerlanniarneqalenera Naleqqamiit akuerinngilluinparparput paasisinnaanatigulu allat takusinnasarpal takorusunngimmassuk, ajoraluartumik oqassaagunaasit qanormi oqarpugut.

Nunap inui aalisartullu ikiorniarlugit oqaasertalorsorlugu akerlianik pilliutaasut eqqaanagit aaqqissuussilerneq Naleqqamiit akueriuminaateqaarput inuaat allat eqqarsataasiat aningaaasatilissuillu nuna allameersut kisimik aallaavigalugit oqaluutigaluni inuaqatigiit kalaallit pigissagaat oqalutoqarnera tupigusuutigeqaarput ilami pilliutaasut killilersugaasullu nunatsinneersut pisinnaasut annertuumik eqquaasussat annertummata.

Ersareqaaq eqqarsartariaaseq kalaallit eqqarsartariaaserinngisaat kisimi atorlugu aaqqiiniartoqalersoq aammalu aningaaasat kisimik qitiutillugit suliniartoqarmat ajorsartussat sattaaserluni naakkittaassuseqarluni pissusilorsefigineqarnerat Naleqqamiit tupigusuutigeqaarput

Tupigusuutigaarput nunami maani amerlasuut taamatullu nunap inui pilliutigalugit ajornersumik inissillugit qinikkatut sulinitssinni nunaqqaterpassuatta ajornerusumik inissinnissaanik inatsisiliortoqarnera paasisinnaangilluinnaqqissaarparput.

Kukkussutaasimasut inunnellu amerlasuunut sunniutaasimasut iliniarfiginagit taamatullu ilikkarfiginagit maannakkut pilliuteqangaatsiarluni aalisartut, sulisartut, namminersortut, ila Inuaat Kalaallit ajorsartussanngorlugin initsisiliorterput piffissaq kingulleq angullugu tamaviaarluta aaqqiiffiginiarsimagaluarparput ajoraluartumillu kalaallit qitiunatik nunap inui qitiunatik ataatsimut katersuuffeqartoqarpoq avatangiiserisat oqarituuterpassui tusaanngilluinnaqqissaarlugit.

Ajugaasussat ikeqaat killeqaqaat, kikkut immikkut sullinneqartut ersareqaaq tamannalu maluginiarneqanngitsuuusaarneqarsinnaanngilaq, tassalu aningaasaq kisimi qitiutillugu eqqarsartut uani ajugaatinneqarput ajornerpaarlutu taamatut ajugaatinneqartut tassaanerulluitk nunatta avatqaaneersut maani ineriatortitsisut nunaqartullu pilliutigalugit.

Aalisarnermut inatsisissaq nunap inuinut amerlanerpaanut iluaqutaasumik pioreersullu suleqatigalugit aaqqissunneqarlungilu inerisarneqartussaanera tamaviaarutigisimasarpus tusaaneqanngilaq kattuffit suliniuteqartut allallu aarlerinerat soqutiginngilluinnarlugu sattaaserluni siunnerfeqarneq politikkikku soqutigittaalluinnartumik piissuserineqartoq ilungersunarpoq aammalu inuiaqatigiinni ingerlaaseqarnitsinni allanngortittariaqarluinnartut ilagaat.

Kukkussutaasimasut Naleqqamiit ilikkarfigalugit aaqqiinissarpus ingerlaqqinnissarpullu pingaartissivarput ilami aamma nalunngilarput PNNP kisimi periarfissatut isiginagu arlalinnik allanik periarfissaqartoq, aamma nutaat pulaniarnerminni akiisussaatinngagis pisassinneqarniarneranni pioreersullu suleqataarusunnerat tusaaneqanngilluinnerat maluginiarlugulu tupigusuutigeqarput.

Killifippit imaannaanngitsuuvoq Kattuffit atusisut susassaqartut tusaaneqaratik inisisimapput ilai tupinnanngitsumik ernumeq pigat aammalu ernumateqarnertik inuiaqatigiinnullu sunniuteqartumik nalimmassaqqittariaqarnertik oqariartuutigisaaraat Naleqqamiit tusaavagut.

Naleqqamiit tunngavilimmik tupigerpaavarput piffissaq kingullerpaaq atorlugu, kukkussut annertooq tassaasoq Inatsit tamanut naligimmik atuuttussaannginnerra naaperiarneqarusuleriasaarmat. Allanngummullu kingunissaat paasiniarnissaat soqutigineqarani.

Kalaallit Nunatsinni inuussutissarsiutitta pingaarnersaat aalisarneq sattaaserluni allanngorniarlugu aaliangersaaffginiarneqarnera Naleqqamiit akuersarsinnaanngilluinnartutut isigaarput aammalu akisussaassuseqanngilluinnartut isigiinnaratigu tusaaniarani Kattuffit nunap inui qulaatiinnarlugit aaliangersaniarneq akuerinngilluinnarparput.

Nammisortutut ingerlasut annertoorujussuarmik ilanngartuifigineqaannanngillat, kisianni aamma inerisaqataaniarnerat aningaasalersueqataasinnaanerallu annertuumik innarlerniarneqarpoq. Pisortat ingerlataanni aningaasatigut kingunerluutaasussat qulaajaffigeqqaarnagis aningaasaliissussanillu qulakkeerinnigani maannakkut siunnerfeqartoqarnera assorujussuaq inuiaqatigiinnut sunniupilutigisassai aarleqqutigaagut taamatullu fabrikkit matoorarniarneqarlutik inissiffiussut pisortat ingerlartsiviini sorliissanersut oqaatiginaveersaardeqarlutik innuttaasut sinerissami toqqissimajunnaarneranik pisortat pilersitsitsipput.

Pilersaarusiornerlunneq sattaaserluni taamungaannaq aaliangersaanerit fabrikkit matooragassat suut maoorarneqassanersut oqaatigisinnanagis kingupilussai oqaluttuarisinnaanagis maanna aliangersaaniarnerat inuiaqatigiinnut mittatiginninnertut toqqissimajunnaarnerermik pilertitsisuusut oqaatigisariaqarput.

Inatsisartut Inatsisissamik aaliangiisinnanngilagut kingunissai nalullugit taamatullu neriuuteqaannarluta ajornaviangitsoq neriuutigalugu aaqqiiniaannarsinnaanngilagut. Inuiaqatigiinnut aningaasatigut allatigigullu sunniutissai takusinnaallugit aaqqisoqartariaqarpoq nunatta aningaasarsiornera sumiiffinni aningaasarsiorerit ajalusoorinnejarlunnassannangippata.

Mittarfissuarnut aaliangersaanermi kukkanntaasimasut uani uteqqittariaqanngillat maannakkummi tusaalereerpagut Kangerlussuarmiit nuugartussat sunniutissai aallaqqaammullu taakkartukkagut allaat maanna kingusinaarluni takuneqalerlutik allaat taasiiffigeqqullutik kommunit ilaasa suaartaatigilerpaat sunniutigisai qangaaniilli aarleqqutigisagut taakkartoreernikuusagut tusaanngitsuuusaarneqarsimagaluartut piviusortai takkussuutilermata.

Aalisarnermut Inatsisissamut siunnersuut tusarniaassutaanerata nalaani tusarniaassutigereerneranilu Naalakkersuisut nunatsinnit angalaqattaarput, tunuliaqutingnooq tapersiinerat politikkiminnut qulakkeereerlugu tusarniaaqqippunngooq. Tusarniaanermi akissuterpassuit aammalu naleqqussaareerluni naleqqussakkat annikitsuinnannguit aallaavigalugit saqqummiisaartut Kattuffiit susassaqartullu assigiinngitsut takutippaat kingunipiluutigisassai amerlaqisut arlaqartut innuttaasut Kattuffiillu tusaaniarneqarsimamatik tamangajammik misisigisimasorpassuusut ataasiakkaannguit ilaannakusoortumk isuamaqataasut eqqaassangikkaanni.

Siullermeerneraniik massakkumut, susassaqartut aammalu kattuffiit siunersiorneqarsimapput. Qaammat ataasingajassuaq politikkerfiginagu, isumaqatiginniartoqarnani, aatsaat piffissaq kingulleq atorlugu Naalakkersuisooqatigiit iluminni isumaqatiginniarput. Inerneratalu takutippaa suli susassaqartut kattuffiillu tusaaneqarsimanatik, puttup iluani aqutissamik nanisaqaratik allannguiniartut.

Innuttaasut neriuutigisimavaat politikerit nunatsinni amerlanerpaanut pitsaanerpaamik ujartuinissaat. Takorloorneqarsimaganngilaq ammanerusumik aqutsiumariarluni, illuatungiliuttullu suaartaannarneraarialugit, killiffigissagipput kalaallit ajorsartussanngortinnejnarerat.

Ajoraluartumilli isummanik allanik tusarnaarumanatik partiit anginersat marluk ullumikkut nammineq pissaaneqarnissartik qinerpaat. Qularutigineqarunangnilarmi piviusut paasilerunikkit, nammineq ajortuliatik aaqqinniarlugit qineqqusaaqqikkumaarmataasit ajorluinnartumik aaqqiinikut.

Nunap inuinut pilliuteqarneq akuerinngilarput aalisartorpassuarnut pilliuteqarneq akuerinngilarput aammalu namminersortut pisortallu assigiinngitsiuffiusumik inatsisiliortugit iliuuserqarnerat akuerinngilarput, taamaammat naligiinngitsumik inissiiniarneq akuersimangilarput taamaammallu assigiimmik inatsit atuunnissaa sakkortuumik kaammattutigisimavarput.

Ataatsimiitaliami ikinnerussuteqartut Demokraatineersut siunnersuut pillugu ima oqaaseqarumapput:

"Aalisarneq pillugu inatsit siuariartuutaalluni ineriartuutaasoq kissaatigalutigu Demokraatit tungaannit aallaqqataaniilli nalunaratigaarput. Aammattaaq niuernikkut atugassarititanik aallaaveqarnerusumik inatsiseqartariaqartugut arlaleriarluta oqaatigisarparput. Eqqaamaneqassaaq aalisarneq avammut nioqqtissiatuarigatsigu. Inuaqatigiinni atugarissaarnitsinnut annertuumut akisuumullu annertuunerpaamik kisiartangajaallunilu tapeeqataasuuvoq.

Tamatuma saniatigut inuaqatigiit aningaasaqarnerannut tunngasumik naatsorsuinerit tutsuiginartut aalisarneq pillugu inatsimmut tunngavigneqarsinnaasut amigaatigaagut. Inatsisissatut siunnersummut nassuaatit kisiinnaasa atuaraanni annertuumik kinguneqarnissaa takuneqarsinnaavoq. Tamanna inuaqatigiinnut aningaasaqarnikkut suliffissatigullu annertoorujussuarmik kinguneqassasoq Naalakkersuisut namminneq allapput. Suliffissanik akeqarnissaa nassuerutigineqarpoq. Aalisarnermut aningaasalersuiniarneq ajornakusuussasoq nassuerutigineqarpoq. Allaallumi Royal Greenland pisortanit pigineqartoq raajarniarnermi qułarnaveeqqusiususatut isigineqarpoq. Tamanna immini unammilleqatigiinnermi

naligiinngitsumik atugassaqartitsilissaaq. Tunngavissalli maanna aamma allanngorput, tassa raajartassiisutaasa ilarujussuannik ataatsimiititaliami amerlanerussuteqartut ilanngaaffiginiarmatigit, tamatumalu peqatigisaanik pisassiissutit amerlassusissaattut killilliussap ataani toqqaannartumik toqqaannangitsumillu pisassiissutit ataatsimut naatsorsorneqarniarlutik.

Inatsisisstatut siunnersuut aallaqqaataaniillu isornartoqartipparput. Uagut inuiaqatigiittut piitsuunerulernissarpot aammalu suliffeqarfut ataasiakkaat sakkortuumik pillarnerisigut ingerlatsivinni assigiinngitsuni annertoorujussuarmik aningaasalersuisussaqarnikkut ajornartorsiortoqalernissaa ernummatigisimavarput. Tamatuma nunami imaanilu suliffissarpassuarnik akeqarnissaa ernummatigisimavarput.

Ataatsimiititaliallu isumaliutissiissutaa qiviaraanni uagut Demokraatit tungaannit ernummateqarnerput minnerulinngilaq. Isumaliutissiissummi atuarneqarsinnaasutut ingerlataqartut inatsimmik taassuminnga malinnittussat tamaasa naapeqatigisimavagut. Aalisartut, aningaaseriviit, kattuffiit il.il. Aamma taakku nilliaataat avaqqunneqarsinnaanngillat. Tunngaviusumik isigalugu tamangajammik isumaqarput pitsaasumik tunngavissaqarluta tamanna torersumik ingerlattariaqarippot.

Tassunga atatillugu aalajangersimanerusunik ima oqaaseqaateqarumavunga:

- 1) Tusarniaaneq assorsuaq isornartoqarpoq. Juullip nalaani ingerlanneqarnerata kattuffinnit tamangajannit isornartorsiorneqarnerata saniatigut tusarniaanermut akissutit amerlanerpaartaasa akuerinissaat Naalakkersuisunit kissaatigineqarsimannngilaq. Akissutigineqartut taakku ilparujussui ingerlatsiveqarfinni assigiinngitsuni soqutigisaqaqtigiiinit pingaarutilimmik inissisimasunit tunngavilersorluagaapput.
- 2) Inatsisisstatut siunnersuut tunngavigalugu politikkut isumaqatigiinniartoqarsimannngimmatt erseqqissaatigineqassaaq. Inatsisisstatut siunnersuuteqartoqarnerata kingorna akunnermi kingullermi taamaallaat imarisai isumaqatigiinniutigineqarput. Tamanna politikkut akuerineqarsinnaanngilluinnarpoq. Ingammik ammasuunissamik peqataatitsinissamillu oqaluttoqartillugu.
- 3) Isumaqarpugut pisassiissutit amerlassusaasa killissaannik aalajangersaaneq misissueqqissaarinernik naammattumik pitsaassusilinnik tunngavilersorneqanngitsoq. Isumaqarpugut suliffeqarfut piovereersut ukiuni 40-ni suliffeqarfimminnik ineriartortitsisimasut pillarneqartariaqannngitsut. Pisassiissutit amerlassusaasa killissaat ingerlatseqatigifinnut tamanut 20 %-imut inissinneqarpat tamatuma pisassiissutit ima amerlatigilersissavai ineriartornermut aningaasalersuisussaarussalluni. Aningaaseriviit soraernerussutisiaqalernissamullu aningaasaateqarfik SISA erseqqissumik nalunaarput piffissaq pisassiissutinik piginniffiusoq minnerpaamik sivisunerusumik akilersuiffiusinnaasariaqartoq. Tamanna amerlanerussuteqartunit akuersaarneqanngilaq aningaasaqarnikkullu kingunerluuteqarujussuassalluni.
- 4) Pisassiissutit inunnit ataasiakkaanit pigineqarsinnaasut 12,5 %-iunissaat isumaqatiginngilarput. Qaffasinnerusumilli killiliisoqarnera inuiaqatigiinnut aalisarnermullu

iluaqutaassappat? Tamannali ilisimaneqanngilaq Naalakkersuisut aamma tamatumani naammattumik pitsaassusilimmik naatsorsuisimanngimmata.

5) Pisassiissutit amerlassusissaattut killilliussap ataani toqqaannartumik toqqaannanngitsumillu piginnittuuneq aningaasalersuissat eqqarsaatigalugit ajornartorsiutinik pilersitsivoq. Islandimi maanna periutsip atuuttup isiginiarneqarnerunissa kissaatiginartippalput, tamatumani ingerlatseqatigiiffit nunaqavissut aningaasaateqarluartut aalisarnermi aningaasalersuinissamut periarfissinneqartarlutik.

6) Nunat allamiut piginnittuunissaat inerteqqutaalersinniarneqarpoq imaluunniit taamaappa? Pisassiissutinitiit pigisat utertinnejarnissaannut piffissaliunneqartoq ukiunik tallimanik-qulinik sivitsorneqarpoq, tamatumalu saniatigut immikkut ittumik akuersissuteqarnissamut periarfissaqarluni. Inatsit nutaaq malillugu soraarnerussutisiaqalernissamut aningaasaateqarfiup suminngaanneersuugaluaruniluunniit nunami maani ukiuni tallimani allakkanut nakkartitsiveqarnissaas pisassiissutinik pisinissaanut kisimi piumasaqaataavoq. Tamanna marloqiusamik paasineqarsinnaavoq, isumpullu malillugu taama inatsisiliortoqarsinnaanngilaq. Inatsimilu pissutsit tamaasa isigissagaanni periuseq tamanna naapertuitinngilaq.

7) PNPNP-ip atuutsinnejalernissaa pitsaasuusoq isumaqtigaarpalput, aamma sinerissap qanittuani aalisarnermi. Tamanna aalisartunut pitsaanerusunik atugassaqartitsilissaaq aammalu piumasunut pitsaasumik ineriertitsinissamut periarfissiilluni. Eqqaamaneqassaaq taama aalisarnermut ikaarsaariartut aalisarlutik pisarisartakkamik amerlaqataannik pisassinnejassammata. Aqutsinerli eqqumaffigineqartariaqarpoq. Qaleralinnut TAC tamarmiusoq annikitsuaraannanguamilluunniit apparneqarpat inuit ilaannut annertoorujussuarmik kinguneqarsinnaavoq.

8) Sinerissap qanittuani raajarniartut 75 %-imik tunisassiornissamut akuersisummik tunineqarnissaat isumaqtigilluinnarpalput. Aalisartut ataasiakkaat aalisagartaminnik qaleruartaminnillu tunisinerminni akinik pitsaanerpaaamik pissarsinissaannut tulaassisussaatitaaneq ataatsimut isigalugu naapertuitinngitsumik unammilligassaqartitsisoq isumaqarpugut. Iluaquteqarnissamulli pisussaaffiup 85 %-imut inissinnejarnera akerleraarput. Ingerlataqartut amerlavallaat pisassiissutitik tamakkerlugit pisarinngikkunnikkit tamanna soorunami naapertuitinngilaq, pisassiissutinilli pigisat ilaannik pinngitsaaliisummik tuniniaaqqueneqarsinnaaneq inatsimmi periarfissaassanngilaq. Tamanna killiussatut atugassaritissallugu pitsaasuunngilaq.

Oqareernittut inatsit matumani pineqartoq pitsaasumik tunngavissaqarluni torersumik suliarineqartariaqarpoq. Inuaqatigiit aningaasaqarnerat suliffissallu pillugit misissueqqissaarinerit pitsaaasut suliatsinni tunngavigisariaqarpagut. Maanna taamaattoqanngilaq, taamaatumillu inatsisissatut siunnersuut soorunami tapersersinnaanngilarput."

Ataatsumiititaliap taama oqaaseqaateqarluni isumaliutissiisummilu allassimasutut paasinnil-luni inatsisissatut siunnersuut aappassaaniigassanngortippaa.

Kristian Jeremiassen
Siulittaasoq

Jens Napātōk
Siulittaasup tullia

Harald Bianco

Mikivsuk Thomassen

Jens Kristian Therkelsen

Karl Tobiassen

Jens Frederik Nielsen